

Prof. dr. Sead Šemsović  
Odsjek za književnosti naroda Bosne i Hercegovine  
Filozofski fakultet Univerziteta u Sarajevu  
[sead.semsovic@ff.unsa.ba](mailto:sead.semsovic@ff.unsa.ba)

Predsjedniku Nacionalnog prosvjetnog savjeta  
Članovima Savjeta

**Predmet: Odgovor na dopis gospodina Veroljuba Ilića**

Poštovani!

Dopis gospodina Veroljuba Ilića, ispred Srpskog filozofskog društva, sadrži sasvim proizvoljne, neutemeljene i nacionalistički ostrašćene opaske koje ozbiljno nagnju fašističkim idejama, što donekle iznenađuje, jer bi ljudi skloni filozofiji valjda trebali biti zaljubljenici u mudrost, a ne mržnju. Dakle, gospodin Veroljub Ilić uputio je dopis Predsjedniku Nacionalnog prosvjetnog savjeta i članovima Savjeta, kako bi iznio svoj stav o programu nastave i učenja za četvrti razred srednjih škola za predmet bosanski jezik i književnost.

U autorskom timu, pored mene nalaze se i kolegice Elvira Đekić, predsjednica Odbora za obrazovanje pri Bošnjačkom nacionalnom vijeću i profesorica bosanskog jezika i književnosti novopazarskoj Tehničkoj školi, i Alisa Džemić, profesorica bosanskog jezika u tutinskoj gimnaziji. Pored ovoga prijedloga programa nastave i učenja, u obrazovanje na bosanskom jeziku u Republici Srbiji uključen sam kao autor, koautor i koordinator brojnih drugih proizvoda koji su bili potrebni za funkcioniranje ovoga obrazovanja. Stoga sam se i osjetio pozvanim da vam se u svoje i u ime kolegica upravo ovako i obratim.

Ilićev dopis sadrži najprije neutemeljene ocjene koje autor nigdje nije dokazao, i to kazavši da „ovaј докуменат пати од бројних недостатака, како од некохеренције и фалсификата тако и садржаја црно-белог сликања директне политичке ангажованости.”, na šta se autor u daljem tekstu ne osvrće niti obrazlaže. Ta će se blasfemija nastaviti i dalje, kada će autor dopisa imputirati da smo upotrebljavali pojам bosanska književnost zajedno s pojmom bošnjačka književnost, što nije tačno. Ponovnim uvidom u material ustanovio sam da je jednom upotrijebljen pojам “bosanski književni jezik”, što Ilić očigledno ne razumije, pa misli da taj pojам znači “bosanska književnost”. S druge strane, Ilić i dalje negira pravo Bošnjaka da svoj jezik imenuju onako kako ga oduvijek imenuju, imenom “bosanski jezik”, pa će kazati “уз сву проблематичност концепта босански језик”, što bi za nekoga iz oblasti filozofije i nekoga u demokratskom društvu 21. stoljeća trebalo predstavljati sasvim retrogradnu ideologiju, ali ne, ona je u Ilićevom slučaju sasvim moderna. Dalje, ideja da se nekome treba/može/mora osporiti pripadnost korpusima više nacionalnih književnosti je sasvim šizofreno mišljenje, tako će Ilić zabranjivati Selimoviću da

bude i bošnjački pisac, jer on može biti isključivo privatno vlasništvo srpske književnosti, a o čemu smo više puta pisali Savjetu o statusu Selimovića unutar korpusa savremene bošnjačke književnosti. Da se ovaj patološki slučaj razvija i dalje dokazuje Ilićev stav da u nastavnim sadržajima ne smije biti poema Džemaludina Latića *Srebrenički inferno* – “дело проблематично по свом садржају зато што заступа тезу о почињеном геноциду у Сребреници над муслиманима од стране српских војника”. Moram naglasiti da ne postoji nikakava “теза о починjenом genocidu”, nego da postoji niz pravosnažnih presuda međunarodnog suda. To mi sve izaziva misao da li bi se u Njemačkoj moglo desiti da neko, možda i iz nekog udruženja filozofa, traži da se *Dnevnik Ane Frank* izbaci iz nastavnog plana i programa, odnosno da se zanegiraju presude suda u Nürnbergu. Koje je to etičko dno koje još uvijek nismo dotakli? Preostali dio dopisa Ilić će koristiti za izjavljavanje nad jednim od najznačajnijih bošnjačkih književnih historičara, nad prof. dr. Muhsinom Rizvićem. Najprije stoji činjenica da Ilić uopće nije razumio pasus u kome se ime ovoga velikana bošnjačke književne kritike i historije spominje.

Pasus u originalu izgleda ovako:

#### *Književna kritika i esejistika*

Učenike treba upoznati sa časopisom *Izraz*, potom *Bošnjačka književnost u književnoj kritici* (edicija Alef), *Antologija bošnjačke književnosti*; Midhat Begić, Muhsin Rizvić, Enes Duraković (književna kritika), Skender Kulenović (književnokritički eseji).

\* Eseje i kritike najprije obradivati uz djela predviđena PNU.

Iz ovoga će pasusa Ilić izvući sljedeći zaključak:

“Не мање проблематично је укључивање у средњошколски програм четвртог разреда књижевних критичара који су веома запажени по тенденциозним и неутемељеним интерпретацијама српског духовног наслеђа, како старије тако и савремене српске књижевности. Ту пре свега мислимо на укључивање у програм Антологије бошњачке књижевности критичара и књижевног историчара Мухсина Ризвића...”

Najprije valja kazati da gospodin Ilić uopće ne poznaje značenje pravopisnih znakova, pa tačku-zarez čita kao dvotačku, jer kako drugačije objasniti da naslov jedne edicije koja nema nikakave veze s Rizvićem bude njemu pripisana. S druge strane, Rizvić je autor 15 autorskih knjiga, oko 350 naučnih studija i drugih ogleda, a o njegovom je naučnom radu govoren u više od 200 različitih vrsta tekstova. Činjenica da je autor i knjige *Bosanski muslimani u Andrićevu svijetu*, u kome povezuje Andrićev izvanknjizhevni politički i naučni angažman sa njegovim književnim radom, niti Andrićevom djelu umanjuje estetsku vrijednost niti samom Rizviću umanjuje vrijednost ostalih knjiga. Bošnjaci imaju pravo na vlastitu interpretaciju kako svoje tako i drugih književnosti. Moguće je da gospodin Ilić uoče i ne zna ko je Midhat Begić i na koji je način zadužio srpsku književnost i srpsku nauku, ali to naravno i ne komentariše.

I u konačnici, da ovaj Ilićev dopis ima krajnje uvrnut odnos prema svijetu koji ga okružuje, ukazuje i posljednji pasus u kome se kaže:

“Ако су национални савет бошњачке националне мањине и писци програма за гимназије били под притиском руководства бошњачког националног већа, Национално просветни савет и Завод за унапређивање образовања и васпитања се морају руководити задатим циљевима образовања и васпитања Републике Србије.”

Iz koje to sada pozicije govori gospodin Ilić? Kao filozof? Kao predstavnik Zavoda za unapređenje? Šta zapravo znači ovo insinuiranje o pritisku rokovodstva Bošnjačkog nacionalnog vijeća?

Cijela ova analiza Ilićevog dopisa u cilju je potrebe za pojašnjnjem, da li ovakvi pojedinci i njihovi stavovi utječu na konačno mišljenje Nacionalnog prosvjetnog savjeta koji u kontinuitetu odbijaju planove i programe namijenjene obrazovanju Bošnjaka na njihovom maternjem bosanskom jeziku u Republici Srbiji iznoseći sasvim neutemeljene argumente. Da li preslikavanje ovih stavova u konačno mišljenje Savjeta podrazumijeva da su članovi Savjeta saglasni s nehumanim i nedemokratskim istupima polupismenog filozofa?

Srdačno,

Prof. dr. Sead Šemsović

---

Sarajevo, 23.2.2021.